

16 OCT 2003

OIC-Mesir (Reaksi)/I

DR MAHATHIR BENTANG PELAN DAMAI UNTUK DIKUTI NEGARA-NEGARA ISLAM

PUTRAJAYA, 16 Okt 16 (Bernama) -- Menteri Luar Mesir Ahmad Maher menyifatkan ucapan Datuk Seri Dr Mahathir Mohamad pada perasmian Sidang Kemuncak Pertubuhan Persidangan Islam (OIC) ke-10 hari ini sebagai satu "pelan damai" yang seharusnya diikuti oleh negara-negara Islam.

Beliau berkata Perdana Menteri Malaysia bukan sekadar membuat penilaian yang bijak dan mendalam terhadap situasi yang menimpa dunia Islam tetapi turut memberikan penjelasan tentang satu program tindakan bagi mengatasi masalah itu.

"Beliau (Dr Mahathir) memperjelaskan tentang program tindakan yang amat luas dan penting. Saya harap negara Islam akan mengikuti pelan damai itu. Ia sememangnya satu pelan damai yang baik," katanya kepada pemberita di luar Sidang Kemuncak OIC di sini.

Dr Mahathir menetapkan hala tuju untuk perbincangan pada perhimpunan terbesar negara-negara Islam itu dengan membuat gesaan agar mereka menggunakan kekuatan dan merapatkan barisan dalam menangani isu-isu yang dihadapi umat Islam di seluruh dunia.

Perdana Menteri berkata dengan 1.3 bilion penduduk, negara-negara Islam sebenarnya kuat, tetapi mereka tidak pernah bersungguh-sungguh untuk cuba bersatu dan bekerjasama.

Semasa ditanya mengenai konflik Arab-Israel, Menteri Luar itu berkata pentadbiran Tel Aviv harus dipersalahkan berikutan kegagalan rundingan damai antara pihak yang bertelagah itu.

Beliau berkata Israel telah menghalang setiap usaha yang dilakukan bagi membawa kedua-dua pihak ke meja rundingan.

"Kami dapati setiap usaha (bagi menyelesaikan konflik itu) yang dilakukan oleh negara dan pertubuhan tertentu telah dihalang oleh Israel," kata Maher yang turut menggesa Israel untuk menghentikan dasar seperti itu.

Beliau berkata adalah penting jika Israel mengetahui bahawa dasar sedemikian tidak membawa sebarang manfaat kepada rakyatnya sendiri.

"Lebih cepat mereka (Israel) menyedari dasar itu (menghalang usaha-usaha perdamaian) tidak membawa manfaat kepada mereka, maka lebih baik untuk meneruskan rundingan antara Palestin dan Tel Aviv," kata beliau lagi.

-- BERNAMA

MHI MKO ROS MOZ